



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 7



Tripura CM-i Bangladesh PM nem Queen Pineapple agütsü

Philippines tsüboa malitsü saka rara metenzüktsü: Marcos Jr

VOL. XXI ISSUE NO. 252 (ADOK 252)

DIMAPUR TENTONÜ (MONDAY)

AAMI (JUNE) 24, 2024

₹ 5.00

MMCI-i election tiptema agütsü ayongzüker

Dimapur, June 23, 2024 (TYO): Mokokchung Chamber of Commerce & Industry (MCCI)-i political party, candidate, voter aser sendaktepa alir ajak dang election tiptema agütsü mepishia metetdaksüogo. Mokokchung district nung urban local bodies pezü-Mokokchung town, Mangkolemba, Changtongya aser Tuli nung election agütsü. Voter ajaki iba ya local self-governance tenteter ta angatetdi aser nür jila tarutsü nü ket nung lir, anungji shisaka, sarasadema aser mulungsentsü shitak agi vote enokjang ta MCCI-i sangdong ka nung ashi.

Onoki bangdak ketdangsürtem dang election tiptema agitetsü atema security shitak agütsütsü mepishir. Onoki maparen inyakba nung tenük

yoktsü aser district nung security tsütsü metokmeperi kar adokra ketdangsürtemi iba tebilemstü abentsü ta parnoki metetdaksü. Shishilembartemi nenok senti vote kanga kümdanga enoktsütsü mepishir aser tarutsü dak nükla yur municipal aser town council züngsemtem shimdi, ta MCCI-isa metetdaksü.

Nagaland nung municipality asem rongnung Mokokchung ya ka lir aser shishilembartemi küm aika taoba Mokokchung Municipal Council (MMC) indang tebilemstü khuret bener aruogo. MMC aser MCCI tsüngda tesentaktep tajung lir aser ajak ajungtsü mechi nung iba tesentaktep ayutsüla aser MMC züngsem tasentemi maneni tesentaktep yur inyaksangshia aotsü imlar ta MCCI-isa metetdaksü.

Manipur tsürtemi sepaitem anema lungkak ait

Imphal, June 23, 2024 (Agencies): Manipur kübok lendenlen aliba district tem nung security forces talila lemzüksüba aser village volunteers apuba anema nisung meyirjang aikati yimdong nung lungkak aitogo. June 17 nü lemtet ka agiba atema "Manipur Mamasingi Khollo: The Voice of Kanglei Mothers" tenüing nung tanü lungkak aitba sentong ayongzüka agi.

Lungkak aitertem rongnung tetsür teimba liasü aser parnoki Chief Minister N Biren Singh aser Governor Anusuiya Uikey nati lemtet kar agiba atema mepelaba metetdaksü.

"Onoki Manipur sorkar dang law & order maparen ketdangsüa inyaksü, Arrla 355 agientsü aser security adviser mapa nungi anentsütsü ayongzüker. Maneni,

Manipur home department-i security maparen ajak ketdangsütsüla aser village volunteers shinga maputsüla" ta lungkak aiter kati ashi.

Lungkak aiter kati Central Paramilitary Forces mapa lemzüksüba aitsü. "Assam Rifle-i tiyongtsü nung inyaksü melena Kuki telungpurtem yariba kulitem lir. Manipur tekolaki Centre dang Manipur nung ita 13 tebilemstü indang osang chichiba lemsateptsüla" ta lai ashi.

Kuki telungpurtem dang nungi yimertem kümzüka ayutsü atema village volunteers-i mapa inyaker. Manipur nung tetsütemi Village Volunteers apuba aitsür, ta lungkak aitertemi ashi.

Lungkak aitba sentong balala nung Imagi Meira, AMKIL aser tanga Meira Paibi teloktemi yaritepa liasü.

Manipur hill districts nungi UPSC candidates nem teyari agütsür

Imphal, June 23, 2024 (Agencies): Manipur hill districts nungi tangaleni UPSC-CSE 2024 tatidang agütsü aoba kaketshirtem nem state sorkari allowance agütsütsü. Supreme Court-i tuyuba nung ajemdaker Manipur sorkari senotsü agütsütsü lemtetogo. Manipur nung kin o kin tsüngda mangatetep aliba ajanga Kuki nunger civil service candidate tem Imphal-i maru.

Iba jagi tanga tesemtem nung exam centres lapok aser kaketshirtemi senotsü teyari meshi aser iba onük Supreme Court dangi aben.

Bangdak deputy commissioner tem nem senotsü agütsüogo ta Imphal East District Deputy Commissioner Khumanthem Diana Devi-i tanü ashi.

UPSC-CSE 2024 tatidang agütsüba kaketshir shiai anogo asemnü atema anogo shia Rs 3,000 angutsü. Candidate shiai Rs 9,000 angutsü ta Deputy Commissioner-isa ashi.

June 16 nü preliminary exams agia liasü saka tang tashi senotsü teyari meshiba applications arudar. Külen State sorkari June 25 tashi nung applications agütsütsü mapang züngzüksüogo.

NEET-UG retest nung kaketshir 50% jungnüa maru



June 23, 2024 nü Economic Offences Unit (EOU) ketdangsürtemi NEET-UG exams 2024 nung tim masüba inyaker ka pur LNJP hospital, Patna-i medical examination atema anir aodang agiba noksa ka angur.

New Delhi, Jun 23, 2024 (Agencies): National Testing Agency (NTA)-i Deobarnü kaketshir 1,563 atema NEET-UG examination indang retest agiogo. State 4 aser Union Territory kübok centre 6 nung kaketshir 1,563 nungi 813-i dang retest agütsü aser kaketshir 750 maru ta NTA-i ashi. Meghalaya, Haryana,

Chhattisgarh, Gujarat aser Chandigarh kübok centre 6 nung tatidang menur tenzüka atema NTA-i kaketshir 1,563 nem grace marks agüja liasü saka ibaji agien. Chandigarh nung kaketshir anati NEET-UG retest asütsüba liasü saka tenaprong exam centre-i maru. Chhattisgarh nunga centre 2 nung tatidang agi aser kaketshir 602

nungi 291-i dang tatidang agütsüogo. Haryana nunga kaketshir 494 liasü aser iba nungi parnok 287-i dang agütsü. Meghalaya nunga kaketshir 464 nungi 234-i dang retest agütsüogo. Gujarat nung kaketshir ka atema retest agia liasü. Supreme Court-i tuyuba sülen NTA-i item kaketshir nem compensatory marks agüja aliba agiena liasü. May 5 nü NEET-UG tatidang nung tim masüba inyakim liasü ta Central Bureau of Investigation (CBI)-i first information report (FIR) ka benokba anogo nung retest agiogo. State kar nung tatidang agibayim nung tim masüba inyakogo ta FIR nung shia lir. Iba atema CBI-i teloktem tenteter question paper leaks ken o benoka aliba Godhra o Patna-i yokogo

Dimapur Ward- 22 nung mepetmesü adoka lir

Dimapur, June 23, 2024 (TYO): Dimapur kübok Rainbow colony nung BJP pusemertemi timtem agütsür ta Ward-22 NDPP candidate-i ashi. Ward-22 ya women reservation seat lir aser NDPP candidate Orenponi Humtsoe-i ashiba agi June 21 nü voters' slips alem dang tensa mejungi aküm. "BJP pusemertem gari 30-40 shi ka nung Rainbow colony telungi ait aser timtem agütsütsü merang. Onoki election tiptema

agütsü atema tensa süngjemdaksünür" ta Orenponi-i ashi. Iba tatalokba atema bangdakpur dang tebang agi shiogo aser nungdakra colony nung timtem agütsürtem anema tezüuba nung agütsütsü. Election tiptema agütsü atema colony nung alir nem security shitak agütsütsü amanger, ta laisa ashi. June 26 nü ULB elections agütsü aser iba atema Hombar (June 24) nikong dang 4:00 ako

nung nüboyimba maparen tembangtsü. Külen, Rainbow colony council-i June 26 nü Ward-22 kübok ULB elections nung designated polling station No. 5 telungi tangar shinga maitdaksütsü ta bangjemtepogo. Kija mesüra voter kari polling day nung timtem agütsüra mesüra ozüing alema inyaksangshira ozüing tapet agi merenshitsu ta Rainbow colony council-isa metetdaksüogo.

Dimapur DC-i ghonda 48 atema tenokdangbatem agütsür

Dimapur, June 23, 2024 (TYO): Dimapur Deputy Commissioner & Revising Authority, Dr. Tinojungshi Chang, NCS-i ULBs polling jak dang ghonda 48 tsüngda public sentong kecha magütsü metetdaksüogo. Polling maparen metembang tashi ghonda 48 tsüngda nisung shingaia lokti sentong mayongtsü, madentsü mesüra polling agiba tesem nung election dak sendakba sentong/ Dimapur Deputy Commissioner kecha magütsü ta Dimapur DC-i ashi.

Iba mapang tsüngda cinematography, television mesüra iba mesükba apparatus amshia election osang kecha meprokshitsu. Maneni polling asüba tesem nung musical concert/ theatrical performance/ entertainment/ amusement sentong kecha ayonga magütsü ta paisa ashi. Iba tetuyuba anema inyakertem tepuokdak ayutsü mesüra senchi achitsu mesüra temerenshi anaprong angutsü, ta Dimapur DC-isa metetdaksü. Election inyakyim nung TV/

Mobile phone mesüra iba mesükba apparatus ajanga election osang meprokshitsu noktanger. Iba nung radio ya iba mesükba apparatus nung adener anungji radio ajanga election dak sendakba osang meprokshitsu, ta paisa ashi. Dimapur DC-i Dimapur Municipal/Town Council kübok ULB elections 2024 nung political party aser candidate ajak dang iba osang metetdaksüogo aser June 24 anep dang 7:30 ako nung nüboyimba sentong tembangtsü shisemogio.

Arunachal students union-i NSCN dang kümdangtsü tuyur

Itanagar, June 23, 2024 (Agencies): NSCN/GPRN-i Arunachal Pradesh nung aser talisa Tirap, Changlang aser Longding (TCL) region nung meinprongba magizüker ta All Arunachal Pradesh Students' Union (AAPSU)-i metetdaksüogo. National Socialist Council of Nagaland (NSCN)/Government of People's Republic of Nagaland (GPRN)-i Arunachal Pradesh kübok Wancho region nung ango apuba aser süng atsüngba noktanga tetuyuba ka agütsüba sülen AAPSU-i iba ya metetdaksü.

"GPRN nungi tanga state tem nung meinprong masütsüla. Tarutsü anogotem Nagaland nungi ibala tetuyuba magütsütsüla" ta AAPSU-i ashi. GPRN-i tetuyuba agütsüba magizüker. Arunachal nung lisopurtemi state nung shiruru aser arem-min wazüka ayutsü meteta lir, ta parnokisa ashi. "Iba atema CBOs, organizations aser local & district administrations lir. Onok tebilemstütem asoshi onoki inyaksü koka lir. Anungji tarutsü nung GPRN-i ibala tetuyuba

magütsütsü metetdaksür" ta AAPSU-isa ashi. GPRN-i Longding district nung village chiefs, head GBs, ZPMs aser GPCs ajaki tarutsü putu ajangzüksü atema iba tetuyuba sülen anidaksü tuyur ta shidi ka nung ashi. "Iba tetuyuba sülen manidakertem Wancho region office ajanga senchi achitsu aser tapet temerenshi agütsütsü" ta GPRN-isa metetdaksü. GPRN indang tetuyuba ya June 20 nü social media nung prokshia liasü ta AAPSU-i ashi.

Kargil Rajat Jayanti bilemteta Dimapur nung sentong agi



Dimapur, Aami/June 23 (TYO): Captain Neikezhakuo Kenguruse-i tasü ita takum bendanga agütsüba atema akhum agüja Spear Corps ajanga Bhagat Stadium, Rangapahar Military Station, Dimapur nung June 23, 2024 nü Kenguruse Memorial Run ayongzüka liasü. Iba sentong ya Kargil Rajat Jayanti bilemtettsü aser Nagaland nungi tasü tait aser

tekumdang jabaso Kenguruse-i takum bendanga agütsüba akhum agüja ayongzüka liasü. Iba sentong nung jembidang General Commanding Officer, Spear Corps, Eastern Command, Lieutenant General Harjeet Singh Sahi-i ashiba agi, Kenguruse Memorial Run ya sentong ka dang masü saka Captain Neikezhakuo Kenguruse akumtsübobba aser

bilemtetba temaitsü lir aser pa Kargil War mapang tasü aitba ajanga asenok ajak ajungmesor. Iba sentong nung General Officer ajanga Kenguruse tsürabotem nem tetushi agütsü aser shilem agirtem ajungmesoa sempet agüja liasü. Iba memorial run nung Spear Corps nungi ranks ajak aser kinungertem densema nisung 500 dak temai shilem agia liasü.

Mejangjaba nisung tasü mang ka DH Dimapur nung lir

Dimapur, Aami/June 23 (TYO): Railway Station Dimapur nung flyover bridge telunglen mejangjaba nisung tasü mang ka lir ta June 23, 2024 nikongdang 4:10 ako meta Station Manager, NF Railway Dimapur nungi tezüluba nung osang ka Dimapur Police dangi arua liasü. Iba osang angashili duty nung alirtem iba tesem tonga ao aser

KM 260/3-4, Dimapur, below flyover bridge nung arishi küm 35-40 tsüngta Naga nunger tebur ka tasü mang ngutet, ta Dimapur Police sangdong ka ajanga ashi. Iba nisung ya train agi tsükset südi ta temulung melemteti lir. Ozüng agi melaba maparen ajak tembangba sülen tasü mang ya PM examination aser jangjatsü atema District Hospital

Dimapur morgue nung bener oa lir, ta ashi. Iba nisungba ya jean long pant sentsü tanen, T-shirt sentsü tanak, temang sentsü tajung aser kou tanak lir. Kibur/kinunger/tembar temi Officer-in-Charge, Govt. Railway Police Station, Dimapur den mobile No. 7085055021 ajanga tongtepratep asütsü akok, ta sangdong ajanga ashi.

Tobu nung Assam Rifles temi security senden ka ayongzük

Dimapur, Aami/June 23 (TYO): Assam Rifles temi June 22, 2024 nü Mon district kübok Tobu nung civil administration, civil society aser kaketshirtem den security aser shisa lemsatepba senden ka ayongzüka mena liasü. Iba senden nung Additional Commissioner, SDO(Civil), Extra Additional Commissioner,

Konyak Union tir, Tobu area kaketshir union tir aser Tobu jila nungi tongtipang nisungtem dena liasü. Security dak sendakba ken o jembitsü aser Security Forces, Civil Administration aser civil society balala tsüngta tali amalitep akatsü asoshi lenmang bushitsü nükjidong nung iba senden ya ayongzüka

liasü. Iba senden nung shilem agir temi tarutsü anogotem shilem tajung agia sepaitem den teka amteper yaritepa aotsü pangjemtepa liasü. Nüburtem ajangzüktsü mechi tarutsü anogotem nunga iba ama sensaksem sentong maneni ayongzüka agitsü ajaki mulungtepa liasü.

Assam Rifles temi International Widows Day amung



Dimapur, Aami/June 23 (TYO): International Widow Day (June 23, 2024) nüngtem nung Assam Rifles temi Lungwiram village, Dimapur nung sentong ka ayongzüka liasü. Amitsür temi timtem balala

ajangshiba indang awareness agütsütsü aser parnok tashi aser temeden indang metetdaksütsü nükjidong nung iba sentong ya ayongzüka liasü. Assam Rifles ajanga amitsür yaritsü atema nüburtem lungjemer mera agitsü aser

parnok akumtsüboaa amshitsü ayongzüka liasü. Iba mapang Lungwiram village nungi amitsür tenet tushia amshia liasü aser yimtsüng nung ketdangsür temia Assam Rifles tem nem tenüngsang agüja liasü.

DHFW-i nüburtem ramen nungi jenbua alitsü ayongzük

Dimapur, Aami/June 23 (TYO): Ramen tashidak ajanga temang aronger, koba female anopheles mosquito ajanga metepba nungi adoker. Nagaland nung ramen tabu ana lir, ka Plasmodium vivax aser ka Plasmodium falciparum ajanga lir. Ana rongnung falciparum ramen ya tamajungba lir, ta National Vector Borne Disease Control Programme (NVBDCP), Directorate of Health and Family Welfare ajanga sangdong ka nung ashi. Ramen agi shiranger temang aronger, süksena aiter aser atener, tekolak angr aser saksür, tashi meiti kumdaksür ta ashi. Ramen tesashiba agi menepertem temang kanga metar aser yimya melenshir, nisung memeteti akumer, mangmanger, mementeter mesüra mejajateter, maneni saksür, tzü tera indoker/mindoker/ natzü tanak alur, tepok kanga aor aser tzü rar, teni, tebonü mesüra temang shilem balala nungi azü ayimer. Ramen aliba female anopheles merila yagi kodang temang anema alirtem dak meteper, temang nung parasites prokshir aser anogo ishika lir iba nisungji shiranger. Ramen agi shiranga aliba nisung dak merila agi metepdang parasite ya merila daki azü nung keter aier aser yamaji menatepa aor. Merila ya tzü atsüngtena alidak pokteter, kong female mosquito (merila tetsü) yagi tzüma nung entzü akor aser anogo ishika lir entzü nungi mesen adoker aser merila akumer, ta ashi. Yimti nung merila ya overhead open water tanks,

osettsüset teraksa, tyres tamajung, tenembangtsü maliba osettsüset, kisü-jensüba tesem, kilentzü atsünga aliba, potholes amala nung pokteter. Yimdak-yimtsüngtem nung merila ya alu, ayi/mangrang agi meyipanga aliba tzübo, mamshiba tzübo, gari tetsüng agi menüngpoka alidak, shiruru tsüngnep, kidang amshitsü bendenba tzü nungi adoker, ta DHFW ajanga ashi. Ramen agi shiranger südi ta temulung melemteti alitem azü tendangtsüji tongtipangtiba aser mezüngbuba teinyaktsü lir. Nagaland nung Health Centres aser Government Hospital ajak nung ramen ya angati tendangtetsü. Ramen aliba jangjatetra, tekeratiba nung temang anepalu tenzüktsüla. Govt. Health Centers & Government Hospitals ajak nung ramen tabo anaprong atema mozü angati agütsü, ta ashi. Ramen azüoktsü asoshi nüburtemi tekalen shia aliba ama merila apokba tesemtem (tzü atsüngtena aliba) indoktsüla, kidang kishi aser kichiba nung wire-netting (screening) inoktsüla. Merila sü aser shiruru tila tepsetba merila sü amshitsüla, koba ajanga merila marudaktsüi nokdangba kisüng masü merila ajema kumdaksür. Mosquito repellent cream mesüra coil/liquidator amshitsüla, merila aliba tesem nung senzüdang temang ajunga nembangba süoshi agitsüla, tzü atsüngtena alidak larvivoros ango (merila entzü/mesen achir) metsütsüla aser nüburtem den awareness lemsatepa tekeraba nung temang anepalutsüla, ta sangdong ajanga ashi.

Dept. of Land Resources ajanga aluyimer dang metetdaksür

Kohima, Aami/June 23 (TYO): Aluyimer aser Rubber, Coffee, Areca nut (betel nut) amala tsünüba kija mesüra telok ajak dang July 1 nungi tenzüka pei District Project Officers den tongtepratepa pei alu/farms aser corps den documents bener oa register asütsü metetdaksür, ta Department of Land Resources, Nagaland ajanga sangdong ka nung ashi. Iba mapang Aadhar card den passport noksa aser mobile number bener oa agütsütsüla, ta ashi. Aluyimer, growers indang

tenüng, parnoki yokba süngjanglijang, tesem, plantations indang geo-locations, ajangzüktsü imlaba, quality mesüra grade amala jangjatsü mechi iba maparen ya inyaker, ta sangdong ajanga ashi. Market exploitation nungi aluyimer tem kumzüka ayutsü aser Farmers Producers Organizations tentetba nung yaritsü, danga department nung duplication of works nungi kumzüktsü aser tarutsü nung teyari balala agitsü asoshi yaritsü nükjidong nung iba mera ya agir, ta department sangdong ajangasa ashi.

Agnipath Scheme Agniveervayu Intake atema online registration tenzüktsü

Kohima, Aami/June 23 (TYO): Agnipath Scheme Agniveervayu Intake 02/2025 atema online registration ya July 8, 2024 anüngdang 11:00 ako nungi tenzüktsü, ta Indian Air Force ajanga sangdong ka nung metetdaksü.

Online registration ya aqnipathvayu.cdac.in nungi sütettsü. Registration ya July 28, 2024 aonung 11:00 ako nung tembangtsü aser application ya tetsür aser tebur candidate ajak atema alitsü, ta sangdong ajanga ashi.



Patna, June 23, 2024: NEET-UG exams 2024 ochimashi ken o nung pua alirtem Amongnü LNJP hospital-i anir oa medical check-up agiba sülen Economic Offences Unit (EOU) sepaitemi parnok meyipa anir aodang tangokba noksa nung angur.

Tanü Parliament senden tenzuka tassenpurtem tenangzükba agitsü

New Delhi, Aami/June 23 (Agencies): June 24, 2024 nü 18buba Lok Sabha nung züngsem tassenpurtem tenangzükba agitsü, June 26 nü Lok Sabha Speaker shimtsü aser June 27 nü Tir Droupadi Murmu-i House anaprongla nungi züngsemtem den jembitsü.

Lok Sabha nung pro tem Speaker, Bhartruhari Mahtab-i ketdangsüa Lok Sabha nung Council of Minister tem MP tenangzükba agidaktsüsü.

BJP nungi kümsük tenetbenbuba MP, Mahtab pro tem Speaker shimba atema mangatettep adoka lir. Opposition-ibo iba menden ya Congress nungi K. Suresh nem agütsüsü tim ta ashir.

Minister for Parliamentary Affairs, Kiren Rijju-i, pro tem Speaker menden atema Mahtab

temsüa lir, kechiyong pa kümsük tenetbenbuba Lok Sabha MP inyaker, ta metetdaksü.

Suresh-i 1998 aser 2004 küm elections nung tamakok ngua liasü aser pa tang agi pezübenbuba MP inyaker, ta shia Parliamentary Affairs Minister Kiren Rijju-i, Mahtab bo kümsük tenetbenbuba Lok Sabha nung MP inyaker, anungji iba menden atema pa temsüa lir, ta ashi.

Mahtab-i 1989, 1991, 1996 aser 1999 nunga takok ngua liasü.

Hombarnü Rashtrapati Bhawan nung linük Tir, Droupadi Murmu-i ketdangsüa Mahtab nem Lok Sabha pro tem Speaker tenangzükba agidaktsüsü.

Anüngdang 11:00 ako nung Mahtab Parliament House-i aoba sülen Lok Sabha senden

tenzüksüsü, iba sülen pai Lok Sabha nung lenir, Ato kilonser Narendra Modi ajurutsü.

Iba sülen pro tem Speaker-i ketdangsüa Tiri shimba chairpersons nem tenangzükba agidaktsüsü aser June 26 nü Speaker election magi tashi pai senden ketdangsüa agitsü.

Tenangzükba ketdangsüa agidaktsüba maparen nung Mahtab den yariteptsü atema Tiri Kodikunnil Suresh (Congress), T.R. Baalu (DMK), BJP nungi Radha Mohan Singh aser Faggan Singh Kulaste na aser TMC nungi Sudip Bandyopadhyay nunger shimogo.

Bodhbarnü Lok Sabha Speaker menden atema election agitsü aser Ato kilonser Modi-i senden nung Council of Ministers sangdongtsü.

Lanka navy temi Tamil Nadu nunger angopur 22 apu

Chennai, June 23 (Agencies): Amongnü Sri Lanka Navy temi Neduntheevu anasa Tamil Nadu nunger angopur 22 puogo; Sri Lanka nunger tzüyim nung angu apuba atema parnok apu, ta Rameswaram Fisherman Association-i metetdaksü.

Honibarnü angopurtemji Tamil Nadu nungi apusoa liasü

saka tzüyim nung Sri Lanka nunger navy temi angopurtem rong asem den angopurtemji apu.

Taoba Mongolbarnüa Sri Lanka nunger navy temi Pudukottai District nungi angopurtem pezü pua liasü, iba sülen June 19 nü Tamil Nadu chief minister MK Stalin-i shidi ka ajanga Union minister of

external affairs, S Jaishankar dang Sri Lanka-i apuba angopur pezüji chiochtsü atema tekeraba nung inyakdaktsüner, ta mepishia liasü.

Chief Minister-i Union Minister dang, "Item ama tatalokbatem ajanga angopurtem taküm alitsü jenjang raksatsür aser angopurtem tsübudaktsür," ta metetdakja liasü.

CBI-i NEET-UG exam 'Paper Leak' ken o agizükogo

New Delhi, June 23 (Agencies): Amongnü Central Bureau of Investigation (CBI)-i NEET-UG medical entrance exam nung ochimashi aliba ken o agizükba sülen parnoki mejangjaba nisungtem anema FIRs benokogo.

Honibarnü Centre sorkari NEET tatidang nung ochimashi ken o bushisüngdangtsü atema CBI nem agütsüsü, ta sangdonga liasü.

Ano tanga tatalokba ka nung, Bihar Police-i kasa ken o dak sendakba nung nisung trok puogo. June 21 nüa Deoghar, Jharkhand nunga kasa ken o dak sendakba nung nisung kar pua liasü.

Amongnü Patna nung aliba LNJP Hospital nung pua alirtemji medical check-up

agiba sülen police ket nung agütsüogo aser maneni bushisüngdangdar.

May 5 nü kaketshir lakh 24 dak temai NEET-UG tatidang agüja liasü aser June 4 nü exam result sangdong. Iba tatidang nung ochimashi liasü ta tai tonglokja linük tesem balala nung kaketshirtemi longkak aitba sülen question paper leak asüba tatalokba aika jungkai adokogo.

Ministry of Education-i sangdong ka ajanga, "Exam agiba inyakyim teladak asütsü atema Ministry of Education, Government of India-i iba ken o ya jungjunga bushisüngdangtsü asoshi Central Bureau of Investigation (CBI) nem agütsüsü teletmetba agiogo," ta metetdakja liasü.

Maoists-i amakdang sepai ana pokset

Raipur, June 23 (Agencies): Amongnü Chhattisgarh state kübok Sikma nung Maoists telungpurtemi IED bomb ka pokdaktsüba lendong nung special operation unit - CoBRA nungi CRPF sepai ana süogo, ta police-i metetdaksü.

Maoists telungpurtemi IED bomb ka pokdaktsüba lendong nungji truck nung aliba CoBRA unit nungi sepai ana pokseta asü.

Amongnü nikongdang 3:00 ako meta Silger aser Tekalgudem na tsüngda sepaitem camp anasa Timmapuram yimtak IED bomb ji apok. Iba tesemji state yimtiba, Raipur nungi kilometer 400 shi pilar lir.

Sepai anaji arrshi küm 29, Constable Shailendra aser

truck anisang Vishnu R (35) na liasü.

CoBRA unit 201 nungi advance party sepaitemji Jagargunda police station kübok Silger camp nungi patrolling tenzuka Tekalgudem tsütsüleni aoba mapang nung iba lendong atalok, ta police ketdangser kati osangbenertem nem metetdaksü.

IED apokba sülen tasümangtemji bener arutsü atema sepai tali yoksem aser tang telungpurtem mita ao tenzükogo, ta police ketdangseri metetdaksü.

Taküm April ita nung Chhattisgarh kübok Kanker district nung security sepaitemi Maoists telungpur 29 khaset aser kasa rara nungji CRPF sepaitema asem yirua liasü.

UP sorkari süngdong crore 35 atemtsü

Lucknow, June 23 (Agencies): Uttar Pradesh sorkari state nung süngdonglidong aliba tesem tuluba akümtsü nükjidong nung süngdong crore 35 atemtsü atema state tesem ajaklen campaign ka tenzükogo, ta Amongnü Lucknow nung ketdangsertemi metetdaksü.

Tang Uttar Pradesh nung süngdonglidong aliba tesemji shilem 9 lir saka 2026-27 küm tashi nungbo süngdonglidong aliba tesem shilem 15 akümtsü nükjidong nung sorkari iba campaign tenzükogo.

UP sorkarisa stakeholders ajak dang süngdong metsüh tajung agüjang ta tuyuogo.

Osang angazükba agi, state nung departments aser division 18 pronglai taruba ita nungi tenzuka süngdong atem tenzüksü.

State nung forest department-i süngdong million

140 atemtsü aser rural development-i süngdong million 125.9 atemtsü.

Iba dak alia agriculture department dang süngdong million 25 atemtsü tuyu. Iba denji kasa horticulture department dang süngdong million 15.5, Panchayati Raj department dang süngdong million 12.8, revenue department dang süngdong million 10.6, Urban Development dang süngdong million 3.5 aser higher education department dang süngdong million 1.8 million atemtsü tuyuogo.

Süngdongji village panchayat li, development authorities li, industrial tesemtem, arem, defence aser railway li aser expressways aser ayongtem meketa atemtsü. Iba dak alia medical aser shisaliok rejutem, sorkar kiojentem aser nija litem nunga atemtsü ajungshir, ta sorkari metetdaksü.



New Delhi, June 23, 2024: New Delhi nung tzü agi anüngba anema Delhi Water Minister aser AAP lenir Atishi Singh den AAP lenirtem- Saurabh Bhardwaj, Sanjay Singh aser Gopal Rai nungeri tasemnübuba lumia longkak aidang tangokba noksa nung angur.



TIR YIMYIM

YIMOBILEM (EDITORIAL)

DIMAPUR TENTONÜ, JUNE (AAMI) 24, 2024

Opposition Aliba Shisangtsü

- Tansen Lemtur

Tawa Lok Sabha election agia election osang sangdongba sülen 18buba Lok Sabha mezüngbuba senden tanü (June 24) nungi tenzüker aser July 3 nü tembangtsü. Tesüiba küm 10 tashi Lok Sabha nung opposition züngsemtem nübo kanga ajema liasü saka tangbo Lok Sabha nung opposition MP 230 alitsü, anungji opposition aliba kanga shisangtsü. Tanü nungi tenzükbaba senden ya komaka asütsü? ta aikati yongyaa atar. Election osang sangdongba sülen opposition INDIA bloc-i sorkar akümtsü memerang saka opposition shilem tajungtiba agitsü telemtetba agibaji India nunger ajak atema osang tajung ta bilemer. Tangtang atemabo INDIA teloktepi Parliament nung opposition longjemer shilem tajung agitsü atema bilemdar saka tarutsü nungbo yimtenren tensa melenshiba apir parnoki NDA teloktep nung aliba TDP aser JD (U) anioksemer sorkar akümtsü atema maongka bushitsü südi. 2014 aser 2019 küm election nung BJP kijai sorkar akümtsüsa menden peria nguteta liasü saka taküm election nungbo BJP kijai sorkar akümtsüsa menden peria mengutetba ajanga parnoki taoba mapang amabo tashi tulu mamshitetsü ta bilemer. INDIA teloktepi külem sangdong ka ajanga, INDIA teloktep ya linük temzüng kümzüksüpurtem aser jenjang atuba den mapa manguba tebilemstsü anema nokdakertem ta sangdongogo. Anungji tatartem senden nung opposition-i koba tashi shilem agidir ta aikati yongyaa atar. Opposition-isa party tem tsüngda tangatetba balala liaka parnok longjemer sorkar inyakyim mita reprangtsü. Democracy tashi aittsü atema tashitait opposition kaji kanga tongtibang. Opposition teinyaktsü shilemji sorkar kija aitsütsü atema dang masü saka sorkar inyakyim tajungtiba nung metongshitsütsü atema lir. Lok Sabha election nung opposition-ia menden aika ngutetba ya India nunger democracy atema takok ka ama züngshir, kechiyong opposition tashi aitba ajanga sorkar inyakyim metongshitsüba nung shilem tajung agitetsü. Tang India nunger rongsenketzüng jenjang kanga indar saka lanurtem jenti mapa nung anioktettsüsabo meinyakteter. Küm shia India nunger lanur million 10 dak temai mapa bushi tenzüker aser linük nung sensakertem aser takartem tsüngda ongdang tuluba-tuluba dang akümer, iba ama tensa ka nung sorkari opposition tebilemba-a angadanga asalentong balala yanglutsüji kanga nüngdaka kümogo. Tan mongpu Parliament nung opposition-i NEET-UG medical entrance exam nung ochimashi ken o süoka o lemteptsü merangtsü, iba denji külemi osettsüset/chiyungtsü nung jenjang atuba mazüoktetba aser mapa manguba tebilemstsü onüktem benoka o lemteptsü atema akhangtsü akok. Tesüiba mapangtem ama masü saka tangbo sorkari opposition olajia angadangtsü imlar. Opposition-i akhangba ama sorkari Parliament nung linük atema tebilemstsü onük balala süoka jembitsü melungtsüla. Parliament ya linük atema tongtibang tebilemstsü onüktem nung o lemteptsü atema tongti sabang lir, anungji tebilemstsü onük balala bentetsü atema mapang peria agia o lemtepa telemtetba agitsü nüngdak. Ajisüaka democracy linük ka nung sorkari opposition olasa nembangtsütsü merangra ibajibo kanga tamashi asütsü.

OLEMSABANG

NAGALAND ULB ELECTION NUNG NE MEYONGNEM JENJANG: KHRISTAN TANGATETBA

- Meyu Changkiri, Shillong

Nagaland nung Urban Local Body (ULB) Election anasa arudang, ne meyongnem dak tashi aliba jangja metetsü nüngdaker. Iba Election ya pei tata maparen kisüng ka masü saka Khristan tangatetba nung tarutsü lokti jenjang tajungba melenshitsü asoshi maongka tulu ka lir.

Meyongnem ajanga asenoki ketdangsüba, ochishiba, aser lokti nung temulung agüja shilem agiba nungi asen aliba tesem tajungtiba nung anepalutetsü. Ketdangsüba aser Rongsen Achaayangba Temeshi Laishiba nung sütepa sütepa ketdangsüba indang shia lir. Lipok 1:28 nung Tsüngremi yanglubatem ajak ketdangsütsü aser anepalutsü asoshi meimchir dang yamai ashi: Soyapokya-ang aser jenti rena alimaji süngdakjang...aser alima nung aliba kechisarena madak ketdang sang. Ibaji mesuka, Mati 25:14-30 nung Yisui sempet indang O intepba ka ajanga Tsüngremi agütsübatem shisa kaa ketdang asütsü indang shia lir. Nagaland ULB Election tendak, asen aliba tesem nung lenirtem shima parnoki nebur aser rongsen achaayangba nung iba Temeshi Laishiba tangatetba ya meyipzüka agitsü akok. Asen aliba town tajungba akümtsü asoshi shisatsü bendena inyaka aotsü aseni shimtetba lenirtem teinyaktsü asütsü. Kari lemanng tajungba yanglutsü, tajemtsü tzü tajung peria anepalua agütsütsü, janajari acha-ayanga tatongi rizünga ayuba yimya balala bener arua agütsütetsüla. Item mapa achaayangtsü asoshi ne meyongnem ajanga parnok nem tashi agütsür.

Ochi Obendang aser Junga Benshiba Apijemtsü Shin 29:4 nung yamai ashir, "Chubai ochiba agi alimaji yanger, saka shibai sempet akhanger pai aji atsüngdoker." Aser ano Mika 6:8 nunga yamai shia lir, "Oh nisung, kechi tajung pai ne dang sayuogo, aser ochishia inyaktsü, aser yimlibilem meimtsü, aser ne Tsüngrem den ajemalua jajatsüba dak alema ano Kibubai na nungi kechi akhanger?" Iba Temeshi Laishiba yagi ochi obendang agütsütetba lenirtem indang jembir. Aser item lenirtem shimtetsü asoshi ULB Election ajanga asenok nem sabang tajung lapoktsür. Tepekzük tia nung alirtem, tanur, tetsür, lajar, amitsür, makamaiter mependangi ajak nungdak ajiteta anepalutetba lenirtem shimtsüla. Aseni shimba lenirtem jagi lokti nung ajak asoshi kesa maongka agüja yaritettsüla.

Lokti Ajanga Shilem Agiba Temeshi Laishiba tesayuba nung lokti ka asoshi kija taküm ka teinyaktsüji kanga dang tongtipang ta shia angutsü. Temang ka nung shilem aika liaka, ajakji temang asoshi alir. Item shilem ajakji tongtipang, aser parnok ajakji pei tata shilem ka ka lir. Aser item shilem ajak lokteper temang ka akümer (Rom 12:4-8, 1 Korint 12:12-27). Yamaji, ne meyongnem ajanga lokti yimten nung nai shilem agir, aser iba jagi lokti achaayangtsü asoshi lenirtem shimer. Item lenirtem den netsüng neburtem ajaki lokti ajungtsü asoshi nükjidong tajung yur longjema inyaker.

Tai Tebilemba Senshidaktsüba Yimsüsüba telok (Ruling Party) ajanga dang terenlok bener arutsütsü akok ta asüba tangatetba ya tai lir. Terenlok tajung bener arutsü asoshi züngsem ajakji tongtipang ta angatetsüla. Lenirtem koba telok (Party) nungi süaka nebur asoshi ochishia nendaka inyakrapangla, parnok ajanga government nungi kechi teyari angutsü tim lir itemji bener arua nebur yaritettsü. Iba denji külemi, netsüng neburtemia pei tata shilem meteta shilem tajung agitsüla. Aser ULB Election ama ka nung, nai tangatetba tajung agi shilem agiba ajanga iba yimten yimsüsübaren nai teyari tulu agütsür. Ne Meyongnem Dak Tashi Lokti nung temelenshi tajung adoktsü asoshi ne meyongnem dak tashi tulu ka lir. Ne meyongnem jagi lenirtem shimtsü. Item lenirtemi town asoshi asameyang, lokti anema alitsü, shisaliok, rongsen ketdangsüba, aser lokti nungdak balala asoshi telemtetba agitsü. Ne meyongnem ajanga item lenirtem shimtet nungji, parnoki nangzükbaba ama lokti ajungtsü asoshi sentong achaayanga atalokdaktsütsüla. Netsüng neburtem ajaki kati ka ajungshitepba ajanga item temelenshi tajung adokdaktsütsü.


O Tempang :

Khristan ka ama, asenok ya lokti nung tenendak ketdangsür, ochi nung nokdaktetba, aser yakyaka shilem tajung agitetba taküm asütsüla. Item ya inyaktettsü asoshi Nagaland nung ULB Election ajanga asenok nem maongka tajung bener arutsür. Ne meyongnem ajanga lokti yimten nung nü tienyaktsü ka inyakba dang masü saka lokti ajungtsü asoshi nai teyari tulu agütsür ta angateta inyaktsüla.

Asenok ajaki iba ULB Election ya süoki ia shisadanga shilem tajung agitsü nüngdaker. Temeshi Laishiba tesayuba ama ketdangsüba nung, ochishia lokti nung shilem tajung agiba ajanga Nagaland nung yimsüsüba jenjang tajungba aintsü. Pei meyongnem dak tashi tulu ka lir ta angateta, netsüng neburtem ajaki nükjidong tajung yur apusotsüla. Naga lima yimsüsüba aser terenlok jenjang tajungba bener arutetsü asoshi ajaki meranga inyaktsü nüngdaker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Franklin Graham-i Billy Graham Defense Fund tentetba sangdong



June 22, 2024 aonung Glasgow nung Billy Graham Evangelistic Association-i ayongzükba 'God Loves Your' tour sentong agidang tangokba noksa nung angur. Iba sentong nung sayutsüngir Franklin Graham-i Tsüngrem O jembia liasü.

June 23, 2024: June 22, 2024 aonung Glasgow, Scotland nung 'God Loves You' tour sentong agidang sayutsüngir, Franklin Graham-i Billy Graham Defense Fund tentetba sangdongogo.

Glasgow nung aliba OVO Hydro arena nung lokti tulu den jembidang Graham-i, iba fund ya ajanga United Kingdom tesem ajaklen yimsü temeden ajungkettsütsü, aser iba fund nung ya legal tsütsü nungi takok ngua Billy Graham Evangelistic Association nem agütsüba fund densema lir, ta metetdaksü.

Iba sentong nung adentsü atema nisung 7,500 dak tema adenshia liasü.

Nüngtugu sayutsüngir, asür Billy Graham'er jabaso Franklin Graham ya Billy Graham Evangelistic Association nung Tir aser Samaritan's Purse nunga CEO lir.

Franklin Graham-i, "UK nung Khrista osangtajung aser yimsü temeden atema onoki nokdaker. Sentong balala thinentsüba ken otem nung takok anguba nungi anguba senotsü ya ola madokdaksü amokmerenba Khristantem yaritsü atema amshitsü," ta ashi.

2020 küm United Kingdom tesem balala nung BGEA-i sentong agitsü ayongzüka liasü saka sentong agitsü aliba tesem ajaki thinenja liasü.

Iba sülen Billy Graham Evangelistic Association-i sentong agitsü aliba tesemtem anema ken o benoka liasü.

"Tamalen sentong agitsü aliba tesemtem anema benoka aliba ken otem tang hopta tashi nung aika bentetba ajanga BGEA-i tebilemstü aika koktetogo," ta BGEA-i metetdaksü.

"Iba takok ya onok kija takok masü saka UK nung aliba Khristantem aser

Arogotem ajak atema takok lir," ta Franklin Graham-i ashi.

"Asen loktiliba nung tebilemstü onük aika lir aser nüburtemi teimla bushir. Chichiba teimlaji Yisu Khrista dak dang angutsü, ta onoki meteta lir. Ibayongji Yisu Khrista osangtajung proktsü atema asenok kati ka nungita yariteptsüla," ta pai ashi.

Graham-i, "Iba ya ajanga UK tesem ajaklen Khristantem ajungmesotsü aser tasü itta pei yimsü sadoksadoka lemsatetsü, ta ni amanger," ta ashi.

"Yisuji shiba?. Ibaji metetsü atema taonung na yagi aru asütsüa akok. Yisu dang nungi Scotland piladaksütsü atema shingai meinyaktetsü," ta pai ashi.

"Yisu Khrista ya Tsüngrem chir aser na menen nungi kümzüksü atema Pa alimai aru. Tsüngremi alima oda meim nung Pai Pa ajaso chir agütsü, shibaisa Pa dak amangdir mesamatsü saka teti tatem makai alitsü, ta Laishibai ashir," ta Graham-i ashi.

Franklin Graham-isa, iba ya ajanga United Kingdom nung Khristantem tetsübu kecha makai pei yimsü indang sayutsüngitettsü ta pai amanger, ta metetdaksü.

UK tesem balala nung God Loves You tour thinenstüba ya Khristantem anema inyakba lir, ta züngshia BGEA-i item tesemtem anema ken o benoka liasü, aser item ken o nung takok anguba nungi Billy Graham Evangelistic Association-i dollar sen 650,000 angu.

2018 küm nunga Blackpool, England nung Franklin Graham indang advertisements bus nungi agientsüba anema BGEA-i ken o benoka liasü.

Iba ken o nung obendanger kati Billy Graham Evangelistic

Association pusema obendang agütsüba sülen 2021 küm Blackpool jilai tatok meshia liasü.

June 15, 2024 nüa Franklin Graham-i Birmingham, England nung nisung 8,300 madak sayutsüngia liasü. Iba sentong nungji osangtajung kententem- Michael W. Smith, Taya, Dennis Agajanian aser Tommy Coomes Band-ia shilem agia liasü, ta Billy Graham Evangelistic Association-i osangbener nem metetdaksü.

June 15 nü Birmingham aser June 22 aonung Glasgow nung agiba sentong naprongla takok angutsü asoshi Arogo 320-i Billy Graham Evangelistic Association den yaritepa liasü.

Glasgow nung Pastor, Alex Gillies-i, item ama sentongtem ya Scotland nung kanga nungdaker, ta metetdakja liasü.

God Loves You tour tembangba sülen BGEA den jembidang Victory Christian Centre nung pastor, Alex Gillies-i, "Ozü Arogo ya jenjang kanga tekübok nung aliba tesem ka nung lir. Jashia alirtem, shisatsü nung shirangertem aser senotsü dak sendakba tebilemstü khuret alir nisung jenti aliba tesem ka nung onok alir," ta ashi.

Paisa, "Item tebilemstü ya ozü Arogo nung dang masü saka Scotland tesem ajaklen lir. Item ama sentongtem agiba ajanga pastor tem aser Arogotem nem teimla agütsür, kechiyong item ama tebilemstü jenti aliba mapang ka nung nisungtemi telangzüba (Khrista) bushir. Iba ya ajanga onok nem teimla tulu agütsür," ta metetdaksü.

Franklin Graham leniba nung Billy Graham Evangelistic Association-i maneni 2025 küm nunga United Kingdom nung item sentong agitsü tebilemba lir.

ANOGO ABEN TSÜNGREM DEN

PA MAPATEM TESÜNGMANGTSÜ

Ni ne nem tenüngsang agügsütsü; kechiyong ni tetsübuttsüka yanglua lir. Ne mapatem tesüngmangtsi, aser aji kü nelai shitak junga metet. T.Ken. 139:14

Tsüngremi meimchir yangluba ya tesüngmangtsü jenjang ka nung yanglua lir, pa teyangluba ajunga tetezü keta aser ka-a yanglu. Tsüngremi nungdak ka atema yanglu, pa den tesentaktep ayutsü atema yanglu. Otsü ka kadaktsütsü asoshi yanglu. Tsüngrem den temeimtep alitsü asoshi yanglu. Meimchir shiai na aser ni odang yanglua ta mebilemli. Koda masü jenjang ka ajanga asenok alima nung alira ta mebilemli. Tsüngremi na/ni kanga junga meteta lir. Tsüngremer sentsüwangshi peridaksütsü asoshi Tsüngremi asenok yanglu. Asenoki Tsüngremer jenjang angatetsü kanga nungdak lir.

Meimchir shia nungdak aser khuret balala lir. Kija khuretji pa/la asoshi tulutiba. Ne khuretji ni atema tila asütsü akok. Saka na asoshi ibaji tulutiba. Kü khuret na atema kanga tila asütsü akok, saka ni atemabo kü khuretji tulutiba lir. Iba medem Tsüngremi nisung shia tereprangtsü ka danga mesüktepa meyanglu. Ajak pei-pe jenjang nung tobur junga yanglu. Tsüngremi asenok jenjang tamajung nung alitsü meyanglu. Reprangdang nung asenoki asen sasa pei jenjang mangatetba agi Tsüngrem dang jashir aser asen taküma tamajungba nem atsür odaktsür. Tsüngremi Leyangluba ajak tesüngmangtsü ka nung yanglu ta angateti Tsüngremer jenjang asoshi pa tenüng sangdi. Amen.

KBA Centenary nükla nung Longsapang meshiteta semzük



Kangtsüng (Tuli), Aami/ June 23 (TYO): June 22, 2024 anogo nung Kangtsüng Baptist Arogo 2025 Centenary nükla nung Beautification committee ajanga acha-ayanga yangluba Longsapang meshiteta lapokba sentong ka agiogo.

Longsapang tesem nungi mopung tanük agia tzüma lenden tulu, Naga lima aser Ao lima yim aika penzüksü akoker iba tesem meshiteta lapokba sentong ya kangtsüng Baptist Arogo nung sannüker, Wb.Nüngsangtoshi leniba nung agi.

Wb. Imlimeren Jamir, convenor Media, Documentation aser Album committee ajanga iba Longsapang lapokja liasü.

Küsa sentong nungsa Wb.L. Nüngsang Jamir, beautification committee convenor ajanga mapa takok ngua renemtetba otsü ashiba den külemi yimti nung inyakyonga aruba den

tarutsü nung inyaksü bilema alibatem telok den lemsatet. Yimsüsur tenüng nung Wb. M. Mar Lemtur, Chairman-isa yimti nung Arogo lennirtemi anir terenlok mapa jenti inyakba ngua lenla balala ajak nem tenüngsang aser tepelaba tulu lemsatepa liasü.

Iba denji külemi planning committee convenor Wb. L. Wati Jamir-i shilem agia jembidang yimti nung Beautification committee ajanga maparen takok tulu ngua inyaktetba asoshi tenüngsang tulu agütsü aser anosa aruya aliba Centenary nükla nung rangloker terenlok mapa jenti inyaksü anüngzüka alibatem nunga Tsüngrem lenisüba nung külemi longjemer inyaksü ajongmesoa liasü.

Tatamsa Kangtsüng Baptist Arogo nung Associate Pastor Women, Wt. Wataro ajanga tenüngsang agüja sarasademer sentong tembangja liasü.

AO OSHI ANGAZÜKDAK: TANÜ ANGAZÜKTSÜBA OJANG



Tachila

(adj) Chitettsü akokba chiyungtsü (edible) * Konger tachila machila meteta achitsüla.

Tachitajemtsü

(n) chiyongtsütem (foodstuff) * Tachitajemtsü junga mangudak aikati mapa meinyakner.

OLONG PAITEP # 6826

Grid for OLONG PAITEP # 6826 with numbers 1-24 in various cells.

TIPLÉN

- 1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasatsüngdajatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6825 TELANGZÜBA

TIPLÉN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

NAI-A YA METETTER MA



West Indies nunger wicketkeeper-batter Nicholas Pooran-i taoba opener Chris Gayle indang otsü ka ajatetogo. Nicholas Pooran-i T20 World Cup edition ka nung six teimtiba züktokba otsü yanglu aser iba ya USA den asayadang 12-ball nung sixes 3 dena runs 27 yangludang Gayle indang record ajateta liasü.

Tripura CM-i Bangladesh PM nem Queen Pineapple agütsü



Agartala, June 23, 2024 (Agencies): Tripura Chief Minister Manik Saha-i Deobarnü Bangladesh Prime Minister Sheikh Hasina nem queen pineapples seret 500 bener yokogo.

Agartala - Akhaura Integrated Check Post ajanga pai jiro bener yok.

"Pongdang 100 shia nung queen pineapples trokrok enoker Chief Minister Saha tenüng nung Prime Minister Hasina nem agütsüogo" ta Horticulture and Soil Conservation Assistant Director Dipak Baidya-i ashi. "Bangladesh den tesentaktep ya yakta nungi lir ashi.

asertung dang lir. Iba sempet lemsatepba ajanga tesentaktep akangshir" ta Baidya-i ashi. "Tanü onoki queen pineapples bener yokogo aser iba ya alima nung jiro tajungtem rongnung ka ta züngshir. Iba tetezü ya asenok tsüngda tesentaktep akangshir" ta pai ashi.

Assam Police-i 'All India Police Judo Cluster 2024' ayongzüksü

Guwahati, June 23, 2024 (Agencies): All India Police Sports Board kübok Assam Police-i Guwahati nung 9 buba 'All India Police Judo Cluster 2024' ayongzüksü.

Iba asayamong ya June 24 aser June 30 tsüngda amongtsü aser India kübok state tem aser Central Armed Police Forces (CAPFs) nungi teams 40 shilem agitsü.

June 24 nikongdang 4:30 ako

nung Karmabir Nabin Chandra Bordoloi Indoor Stadium, Sarusajai nung opening ceremony agitsü.

Opening ceremony nung iba asayamong atema mascot Luit sayatsü aser Assam Director General of Police (DGP) Gyanendra Pratap Singh-i tongti tesemdang ama shilem agitsü.

Iba judo cluster nung martial art forms pungu- wushu, taekwondo, judo, karate aser

pencak silat adentsü. Karmabir Nabin Chandra Bordoloi Indoor Stadium, Sarusajai nung taekwondo, wushu aser karate aser külen Bhogeswari Phukanani Indoor Stadium, Dispur nung judo aser pencak silat asayatsü.

Linük kübok tesem ajungalen nungi nisung 1,500 tema iba asayamong nung shilem agitsü.

Amit Shah-i tüzümsüng azüoktsü atema awatsüng yanglutsü ashir

Guwahati, June 23, 2024 (Agencies): Brahmaputra river nungi tzu mesütoktsü atema northeast region nung awatsüng tululu 50 yanglutsüla ta Union Home Minister Amit Shah-i ashi.

Iba ajanga tüzümsüng azüoktsü nung teyari angutsü,

alu ayimba, irrigation aser tourism nung ajangzüksü ta pai ashi.

Amit Shah-i monsoon flood preparedness atema senden ka amendang Indian Space Research Organisation (ISRO) nungi satellite imagery amshia tüzümsüng

azoktsüba maparen inyaktsüla ta pai ashi.

Paisa Glacial Lake Outburst Flood (GLOF) tensatem azüoktsü atema renema atatsüla. Sorkari alima lendong balala nung yariteptsü renema lir ta Amit Shah-isa ashi.

Meghalaya kaketshir 10-i NEET-UG retest meshiba melar

Guwahati, June 22, 2024 (Agencies): Meghalaya nung lisopur kaketshirtemi NEET-UG retest asütsü atema Supreme Court-i tetuyuba agütsüogo.

Supreme Court-i National Testing Agency (NTA) dang kaketshirtem retest südaksütsü atema tetuyuba agütsü.

Meghalaya nungi NEET-UG agütsüba kaketshir 10-i Supreme Court nung tawa tatidang agiba nung metokmeperi liasü anunggi retest asütsüla ta takhangba agütsü liasü.

Meghalaya kaketshirtemi parnoka candidates 1,563

rongnung dendaktsütsü asüngdang. NTA-i kaketshir 1,563 nem grace marks agütsü aser June 23 nü retest asütsü maongka agütsü.

Item kaketshirtem yagi NEET-UG test agütsü dang minute 45 akoksa liasü.

Justice Vikram Nath aser Justice S V N Bhatti na adenba Supreme Court vacation bench-i Meghalaya nunger kaketshirtem ken o July 8 nü ano angadangtsü mapang latetogo.

June 23 nü retest asütsü melaba kaketshir 1,563 den parnok kasa liasü aser iba jagi Supreme Court nung writ

petition benok ta Meghalaya kaketshir 10 tenüng nung lawyer Yoothica Pallavi-i ashi.

Meghalaya nung kaketshir 10 test centres nung tatidang agütsü aser parnoki minute 40-45 shi endok ta lai ashi.

NTA indang inyaksangshi ajanga parnoki timtem ajuru saka parnok retest asüba nung medensem ta Palavi-isa ashi.

"Meghalaya kaketshirtem nem 3 hours aser 20 minutes agütsü saka question papers tai agütsüba aser examiners-i tetuyuba tai agütsüba ajanga parnoki mapang akoksa" ta Pallavi-isa ashi.

Yirur aliba Palestine nunger gari nung sendakba sasar: Israel mitkar

Jenin, Aami/June 23 (Agencies): West Bank kübok Jenin yimti nung tesem kar amakdang yirur aliba Palestine nunger ka mitkar indang gari nung sendaker senzüba ajanga operational procedures nung aibelenogo, ta Israel mitkari Deobarnü ashi.

Mitkar temi bushia aliba nisung kar aputsü atema Wadi Burqin tesem nung counterterrorism operation ka agidang Palestine nungba ya yirua liasü, ta ashi.

Mitkar aser telungpur tsüngta khatapba mapang temulung melemi alir ka yiru aser apu, ta Israel Defence Forces (IDF) ajanga sangdong ka nung ashi.

Honibarnü atalokba indang video ya tesem ajaklen prokshia liasü, kong Jenin nung alir ka military jeep ka indang bonnet nung lendeni alenoker lenmang temesü ka ajanga ao. Palestine nungba ya Burqin aser Jenin tsüngta Jabriyat neighbourhood nungi Mujahid Fayyad ta jangjaogo.

"Totuyuba tem aser standard operating procedure nung aibelena temulung melemi alisang ya sepaitemi gari ka nung sendaklok," ta sangdong ajanga ashi. "Iba video nung mitkari inyakba ya IDF yimya masü," ta ashi.

"Iba tatalokba bushisüngdangtsü aser ozüng agi melaba ama merenshitsu," ta mitkari ashi aser yirur alisang ya temang anepalutsü atema Palestinian Red Crescent nem agütsüogo ta ashi.

Fayyad ya tang Jenin kübok Ibn Sina mozüki nung

anepaluba mapang lir. Mapang talangka nungi Palestine nunger telungpur telok tem Jenin nung tashi ita liasü aser Israel mitkar temi mapang shia iba yimti aser temeket nung aliba refugee camp tem meita aor.

October 7 nü Israel aser Hamas tsüngta rara metenzükdang West Bank nungbo kanga sashia azüdokshi tenzüker liasü aser ano tang tamajungba kumogo. Gaza rara tenzüker West Bank nung Israel sepai mesüra settlers temi Palestine nunger 553 tepsetogo, ta Palestine ketdangsur temi ashir. Kasa mapang West Bank nung Palestine nungeria Israel nunger 14 tepsetba osang lir.

Hamas teloki October 7 nü Israel south tsütsü mapa nisung 1,194 tepsetba sülen Gaza Strip nung ita ti dak tema rara arudar. Telungpuri Israel nungi nisung 251 pua bener ao aser item rongnung tang tashi Gaza nung 116 lir aser item rongnungi 41 süogo, ta mitkar temi ashir.

Iba sülen Israel mitkari Gaza amakdang nisung 37,551 tepsetogo, ta Hamas-i yimsü asüba territory nung health ministry ajanga ashir.

Kasa mapang Honibarnü Israel sepaitemi occupied West Bank kübok Jericho south west tsütsü Ein ad-Duyuk at-Tahta yimtsüng nung Palestine nunger ki asem raksatsü, ta Wafa news agency ajanga ashi.

Palestine nunger social media channel tem nung video prokshiba nunga Israel nunger bulldozer ajanga ki raksatsükdang Israel sepaitemi repranga liasü.

Jericho tesem nung ano ki

ana raksatsütsü atema Israel ketdangsur osang sangoktsüogo ta ashir.

United Nations Office for the Coordination of Humanitarian Affairs (OCHA) ajanga ashiba agi, January 1 aser June 10 tsüngta Israel sepaitemi occupied West Bank nung Palestine nunger meyong ki o jen 565 raksatsü aser nisung 1,034 tesem balala nung jenoka lir.

Honibar aonung nungi tenzüka Deobarnü tashinung Israel sepaitemi occupied West Bank nung nisung 20 puogo, ta Palestinian Prisoner's Society ajanga ashi.

Parnok ya timba Hebron governorate nung apu aser kar Ramallah, Qalqilya, Jericho, aser Tubas governorates tem nung apu, ta iba telok yagi ashi.

Iba mapang Israel sepaitemi apurtem züka merenshi, kinungertem merenshi aser parnok indang ki raksatsü, ta ashi.

October 7 nungi tenzüka tang tashinung Israel-i West Bank nung nisung 9,345 puogo.

Maneni Israel-i Gaza City kübok Sabara neighbourhood nung ki ka amakdang nisung ti asü aser ter dak tema yiru, ta Wafa news agency ajangasa ashir. Ano central Gaza kübok Nuseirat area nung power station ka anasa amakdang nisung ana asü aser kar yiru ta ashi.

Iba ya ajanga ghonda 24 tsüngta Gaza nung nisung 56 tepseter alitsü, ta ashir.

Kasa mapang Israel-i Gaza City nung aliba UNRWA headquarters anasa amak aser iba mapang Palestine nunger nisung pezü tepset.

MENUNGRA BILEMTETTER



TALIMEREN Lkr (Yaongyimsen Village)
24th June 2023

Obala onok nungi pilar küm 1 ajungba anogo menungraa bilemtetter. Küm süla oaga nai toktsür aoba temeimbatem tanü tashi molong züreper. Ne temeim aser terajem mapa tajung onoki bilemtetdang ozü molong süneper.

- Temeim Chirnur, Semchir-semnur aser kinungertem

Philippines tsüboa malitsü saka rara metenzüksü: Marcos Jr

Manila, Aami/June 23 (Agencies): South China Sea nung Philippine Navy aser China Coast Guard tsüngta raratepba sülen Philippines Tir Ferdinand Marcos Jr-i par linük rara mesütsü mapa meinyaker saka shinga tsüboa malitsü, ta ashi.

"Linük kumzüka ayutsü atema onok Filipino yimya nung shidak lir aser ken o ajak yimjung nung angatettepner," ta Marcos-i Deobarnü Palawan asetkong nung Philippine South China Sea sepai indang headquarters semdangba mapang ashi.

Marcos-i resupply mission nung shilem agir rongnir nisung 80 nem medal agütsü aser parnok dang tensa mejungaka linük kumzüka ayuba nung maneni pei mapa shidak inyaksü ajungshia liasü.

"Asenoki shinga metsübotsü mesüra shinga nema majemshidaksütsü," ta Marcos-i ashi saka pai jembidang China tenüng metetshi. Pai international law den apet asen linüki

jangraba yaritsü atema tashi aser temeden maneni amshitsu ta nangzük.

Manila aser Beijing nung aliba China ketdangsur temi Marcos-i jembiba nung telangzüba agüja mali.

China indang anasatiba litsü nungi kilometre 1,000 (621 miles) dak tali pilar aser Palawan nungi kilometre 200 (miles 120) shi pilar Second Thomas Shoal anasa Hombarnü kanga mejungi raratepdang China sepai temi mangatettep aliba South China Sea nung Filipino navy personnel yirutsü aser nok, bo aser hammers amshia mitkar indang rong tila ana raksatsü.

Iba mapang Philippines nunger rongnir ka temeyong kümtsüba lepdoktsü aser China nunger coastguard rongnir temi prangbong aser inflatable boats densema osettsüset raksatsü aser auya ta Manila-i ashi.

Beijing-i par coastguard temi yimya tajung amshia aremzüka liasü ta ashi aser iba raratepba atema Manila tenüng asen.

China-i kanga tongtipang tzü lenmang ajunga amai nung kibur akumtsü meranga tawa asendenshidang China aser Philippines tsüngta mangatettep tali adokba rongnung tang tesüsa atalokba ya tesashiba alitsü.

Iba tatalokba ya ajanga United States, European Union, Japan, Australia aser danga Western aser Asian linük temi aitsü aser aoksatep, aser China o Philippines tsüngta kati ka tenüng sentepa Manila den mutual defence pact ka zülutepa aliba US iba mangatettep nung anioksü südi ta bilemer.

Nok-nü amshia amakba nung Manila yaritsü atema Washington arutsü tezüngzüktep yanglua lir, saka Hombarnü raratepba ya nok-nü amshia amakba masü ta Philippine sorkari ashi.

Litsü-lika agi raktepba nungya China, Philippines, Vietnam, Malaysia, Brunei aser Taiwan dena lir aser iba ya ajanga US aser China tsüngta rara tulu tenzüksü amai alimay repranga arur.

Sorkar anema longkak aitba Wagner telok Kremlin kübok lir

Moscow, Aami/June 23 (Agencies): Alima ajunga aoksaja sen yong raraba Wagner Group ajanga Tir Vladimir Putin indang sorkar anema nokdaker küm ka sülen Russia-i iba telok kanga junga loksar melenogo.

Moscow nung ita aika mitkar lenirtem den mangatettep adoker aruba sülen iba paramilitary force lenir aser Yevgeny Prigozhin-i June 23, 2023 nü Ukraine nungi arütsü alema arua Russia south tsütsü Rostov yimti agi.

Iba sülen parnok mapang tatsüka linük yimtiba leni aru aser iba mapang parnok anema nokdaker meliasü. Ajisüaka Prigozhin-i "march for justice" ta tenüng jaloktsüba ya anogo ka dang lir anena liasü.

Iba sülen ita ana dang lir Prigozhin mena aliba tayimtsü tsükoka pa den danga Wagner lenir aika asü aser iba telok indang tarutsü tia mejangjai akum.

"Wagner ya tesüiba mapang ama malitsü, saka version ka mesüra aika tang tashi alitsü akok. Parnok Russia linük tesem balalai prokshi, anungji parnok ajak azüoker mali," ta UN indang working group on mercenaries nung züngsem aser University of Copenhagen nung lecturer Dr Sorcha MacLeod-i ashi.

"Yimtenren aser rongsenketzüng tsütsü Russia asoshi Wagner Group ya kanga tongtipang liasü, anungji parnok kodanga mesamatsü," ta lai ashi.

Küm aika Africa aser Syria nung Russian operations atema Prigozhin'er telok ya tongtipang aser jenjang aketba hadir ka amai liasü. Saka Ukraine nung Moscow sepaitemi Kyiv indang defences rakpoka motetba ajanga Prigozhin aser Wagner ya arua liasü.

2022 küm tatemlen aser 2023 küm tetenzüklen Russia-i

tongtipang tongpang ishika nung takok anguba ya Wagner ajanga liasü. Wagner züngsemtem ya timba taoba mapang tepuokdak alirtem lir aser parnoki Ukraine anüdoklen Soledar yimti agi aser Bakhmut nung ita aika rara liasü.

Mapang ka Ukraine nung Wagner züngsem 50,000 shi liasü, ta US National Security Council ajanga ashir.

Saka tangbo Ukraine nung Wagner indang operations ya Russia indang state aser paramilitary units temi melenogo, ta iba mongin temi ashir.

Parnok dang ministry of defence nung adentsü mesüra linük nungi ainshitsu ashi, ta taoba mapang Wagner nung lenir kati tawa shia liasü.

Iba telok indang infantry units kar Rosgvardia mesüra National Guard-i melenogo, ta UK itdangiter temi ashir.

Wagner ya 2016 küm tenzük

aser Putin indang "private army" ka ama jembia liasü aser pa indang taoba bodyguard Viktor Zolotov kübok liasü.

Wagner Group ya 2023 küm October ita nungi National Guard tazüokba küboki ait tenzük, ta UK Ministry of Defence ajanga ashi.

Parnok dang "volunteer formations" ta aja aser ex-Wagner troops ya Ukraine nung ita trok contracts nung alitsü aser iba ano Africa nunga ita toku contracts nung alitsü atema yoktsü liasü, ta ashir.

Taoba mapang Wagner züngsemtem Rosgvardia indang Volunteer Corps nung aniocka ajanga Russia sorkari Wagner Group tali azüokba sayur, ta UK ketdangsur temi ashir. Prigozhin-i anir sorkar anema nokdakba nung timtem liaka, Deobarnü küm ka ajungdang Russia nung tatalokba kecha mali anogo süyogo.

Portugal aser Belgium nungeri takok angu



Belgium asayar goal agütsür pelaba noksa nung angur.

Berlin, Aami/June 23 (Agencies): Honibar aonung Portugal-i Türkiye madak 3-0 agi akokba sülen Group F nungi winner ama last 16 tongogo aser Belgium-ia Group E nung par telok asoshi mezüing takok ngua liasü.

Asaya tenzükdang Türkiye-i goal ka agütsütsü maongka tajung ngutet, saka Kerem Akturkoglu-i box telung nungi iba goal magütsütet.

Asaya tenzüker minute 21 buba nung Bernardo Silva-i goal ka agüja liasü, koba Portugal asoshi maongka mezüingbuba liasü.

Ano minute tenet lir Türkiye nunger defender Samet Akaydin-i tesüleni goalkeeper

Altay Bayindir dangi yokba memetsüshi iba goal ya ai.

Minute 56 buba nung Cristiano Ronaldo-i pass agütsüba nungi Burno Fernandes-i Portugal asoshi goal tasembuba yoka liasü.

"Czech Republic den asayaba kasa jenjang nung onoki asaya, saka tan asaya onoki mezüing goal agütsü. Türkiye junga tenzüker saka onoki meranga asaya aser mezüing goal agütsüba sülen asaya amokbanga liasü," ta Portugal head coach Roberto Martinez-i ashi.

Iba takok ya ajanga Portugal ya points trok bener Group F nung temaba jenjang nung lir aser iba sülen Türkiye (points

EURO 2024

asem), Czech Republic aser Georgia ya point ka-ka bener lir.

Group E nung Belgium ya mezüingbuba asaya nung Slovakia-i akok, saka Honibar aonung Romania den asayaba mapang Yuri Tielemans aser Kevin de Bruyne nati goal ka-ka agüja liasü.

Asaya tenzüker minute tanabuba nung Belgium nungi Tielemans-i mezüing goal agüja liasü aser Romania-i tayang kepzüksü merangaka maongka mongutet, aser Belgian striker Romelu Lukaku-i goal ka yokba sernung pa offside liasü aser minute 80 buba nung De Bruyne-i goal ka agüja par teloki akoktsü tejangja akum.

"Iba takok ya onok asoshi anisüingzük tulu lir. Second half nung tera saka liasü, saka first half nung onoki amokbanger asaya. Second half nung onoki defensive tali asaya, saka counters tsütsüa temulung agütsü. Goal tanabuba menur agütsütet, saka ibai anizüingsük lir," ta Belgium goalkeeper Koen Casteel-i ashi.

JUNE 25

Albania Vs Spain 12:30 AM
Croatia Vs Italy 12:30 AM
France Vs Poland 9:30 PM
Netherlands vs Austria 9:30 PM

3 buba NFA referee recruitment tembangogo



Kohima, Aami/June 23 (TYO): All India Football Federation (AIFF) den lungjemer 3 buba Nagaland Football Association (NFA) Referee Recruitment cum Upgradation Course 2024 sentong Indira Gandhi Stadium, Kohima nung Deobarnü tembanga liasü.

Iba recruitment ya June 17 nü tenzüker, koba Kohima District Football Referees Association (KDFRA) ajanga ayonga liasü.

Iba recruitment tembanga sentong nung jembidang, Nagaland nung lungjemer football asaya temaba jenjangi ajungkettsü asoshi football associations, coaches aser referee tsüingta tesendaktep tajung nüngdaker, ta Kohima District Football Association (KDFRA) tir Mhasimhalie Matthew Yhome-i ashi.

Tanü football asaya nung

association kisüingi terenlok tajung bener marutet. Associations, coaches aser referee tem lungjemer inyaksüla, ta pai ashi.

Asenok kati ka yariti aser külemi inti, ta pai ashi.

Nagaland nungi national football referee atema Mechievilie Yashü anitetba atema Yhome-i referee instructor AIFF & Zonal Referee Development Officer (ZRDO) ZRDO, North East Zone, Joychandra Singh dang pelaba lemsatapa liasü.

Singh ajanga Nagaland nungi national level referee adokdaksütsü imlar aser AIFF nung Nagaland tali jangjatsü, ta pai ashi.

Joychandra Singh-ia iba sentong nung jembidang pai Nagaland nungi national referee tebur ka adokdaksüto go ta ashi.

Pai ano Nagaland nungi national referee tetsür ka

adokdaksütsü nükjidong lir ta ashi.

Nagaland Football Coaches Association (NFCA) tir Roko Angami-i "Referee ka ji asayadak tesem nung chuba lir," ta ashi.

Pai referee tem dang football ozüing shidak amshitsü aser ochishia obendang agütsütsü ayongzuka liasü.

Sentong nung Head of Referees (HOR), Nagaland, Kevingutuo Sekhose-ia jembia liasü.

Iba sentong ya course coordinator aser general secretary, KDFRA, Medozevi Punyii menden liasü aser Level 6 candidate & member KDFRA, Kuzolie Neihu-i melepzüing o jembia liasü.

Neivikhoto Vielie, active senior referee candidate aser KDFRA züingsem ajanga sarasadema iba sentong tembang.

Indian archers temi bronze angu



Indian recurve mixed team nungi Bhajan Kaur (abelen) aser Dhiraj Bommadevara noksa nung angur.

Antalya, Aami/June 23 (Agencies): Deobarnü India nunger tarep temeyoktep Dhiraj Bommadevara aser Bhajan Kaur nati Mexico nunger den kanga junga asayateta Archery World Cup Stage 3 nung bronze medal ngua liasü.

Mezüing set nung India nunger ya 0-2 agi tajemba nung liasü, saka iba sülen 5-3 (35-38, 40-39, 38-37, 38-38) agi Mexico nunger Alejandra Valencia aser Matias Grande na madak takok

World Cup Stage 3 nung ibai India asoshi medal tasembuba alitsü aser ano India nunger Dhiraj aser Ankita Bhakat na kija semifinals nung asayatsü lir, kong ano medal ana angutsü imlar.

Honibarnü India tsür compound team nungi Jyothi Surekha Vennam, Aditi Swami, aser Parneet Kaur nungeri gold medal angu aser Priyansh-i silver ka ngua liasü.

India-i runs 50 agi Bangladesh akok

Antigua, Aami/June 23 (Agencies): India-i T20 World Cup cricket asayamung semi-final asayatsü asoshi mera tuluka agia Honibarnü Bangladesh madak runs 50 agi ako, koba Super 8 nung anaben asayaba nungi takok tanabuba alitsü.

Antigua nung aliba Sir Vivian Richards Stadium nung Honibarnü takok anguba nung Hardik Pandya aser Kuldeep Yadav nati tongti shilem agia liasü.

Pandya-i half-century yanglutet aser Suryakumar Yadav dak alaka Indian batter temi shilem tajung agia 196/5 nung tembang.

Iba sülen Indian bowlers temi Bangladeshi batters tem anokshija left-arm spinner Kuldeep Yadav-i over pezü nung runs 19 agütsür wicket asem agia liasü. Bangladesh ya 146/8 nung tembang, koba Super 8 stage nung tamakok tanabuba alitsü.

Jasprit Bumrah aser Arshdeep Singh natia wicket ana-na agia liasü.

Bangladesh-i toss akok aser mezüing bowling shima liasü. India asoshi Rohit Sharma-i anir kanga kera runs agi tenzüker, saka pai kanga kera runs angutsü nükjidong aliba yakta tembanga ball 11 nungi runs 23 dang ngur out asü.

Virat Kohli-ia ball 28 nungi runs 37 nguteta pa form dangi aruba temaitsü sayutetogo, aser

Rishabh Pant-ia ball 24 nungi runs 36 ngur lia reverse sweep merangba mapang out asü.

Taoba asaya nunga pai yamaji azüktsü merangdang out süa liasü. Kohli aser Pant nati runs 32 yangluteta India ya 71/1 liasü, saka Tanzim Hasan Sakib-i Kohli out sütsü aser iba sülen Suryakumar (6) out süja India ya runs 77 yangludang wicket asem out sür liasü.

Over 12 buba nung Pant out süja Bangladesh-i India nunger tali aoksatsü.

Iba sülen Pandya aser Shivam Dube nati meilongi asaya tenati runs 53 bendenloka liasü. Dube-i ball 24 nungi runs 34 angudang sixes asem züker liasü aser India nunger innings tatembangba nung Pandya-ia boundary ka züka pa half-century yanglutet.

Deobarnü iba asayamung danga asaya ka nung Afghanistan-i Australia madak runs 21 agi takok ngua liasü, koba Afghanistan-i Australia madak cricket asaya nung takok mezüingbuba anguba alitsü.

Iba takok ya ajanga Afghanistan ya semi-final atongtsü teimla lir aser Super 8 Group nung temangmangtsü lir.

India nunger ya Super 8 Group 1 nung match ana nungi anaben akokba ajanga temaba jenjang nung lir. Australia aser Afghanistan ya match ana asayaba nung khen-khen koka lir aser Bangladesh ya asaya anaprong nung tamakok ajurua lir.

BILEMDANGANG

"Nai kechi junga inyaktettsü, aji inyaktsü maongka agiang, aser na pela alitsü."